

## Bulitinu Infurmativu

### *Adunarea Atsea Mari a Armânjiloru, Muscopuli 2010*

Pira apreasâ aua sh-doi anji di Costa Canacheu sh-purtatâ pritu Balcanu ta s-dimândâ Adunarea Atsea Mari a Armânjiloru di Iutsido, tu dzuua di Stâ-Mârii 2010, Muscopuli, adusi njilji sh-njilji di-Armânji nu mashi ditu craturli iu elji bâneadzâ, locurli a loru di daima, Makidunia Anticâ, ama sh-ditu alti stati ditu Evropa, America, Canada, Australii.

Aesta mari andamusi fu andreaptâ di Consillu Armânjiloru / Makedonarmânjiloru, hârgiurli furâ anvâliti di sutsatili armâneshtsâ cari aua sh-tsintsi anji bâgarâ thimeljlu alishtei organizatsiuni internatsiunalâ nonguvernamentalâ, unâ institutsiuni armâneascâ tsi ari borgea shi scupolu ta s-andrupascâ câftârli a Farilor Armâneshtsâ ditu cathi cratu ditu Balcanu cari au tu lucru vigljearea sh-diveloparea a limbâljei, a adetsloru sh-a ntregâljei yishteari culturalâ armâneascâ tu tuti locurli iu suntu bânâtori.

Trâ exudli tsi s-featsirâ andrupârâ sh-Armânji cu vreari sh-dukeari trâ sinferlu armânescu.

Andamusea di Muscopuli, iu vinirâ Armânji ditu tuti părtsâli di lumi ta sâ s-cânoascâ, fu unâ furnjii ca Armânjilji sâ s-aspunâ ashi cumu suntu tu locurli iu bâneadzâ, fu unâ furnjii ca Armânjilji sâ spunâ a lumiljei câ nu kirurâ sh-câ nu voru ta s-kearâ, fu unâ furnjii sâ spunâ a lumiljei unâ parti di cultura sh-istoria armâneascâ di ma ninti sh-di adzâ.

Consillu Armânjiloru / Makedonarmânjiloru mindui s-andreagâ Muscopuli aestâ andamusi a Armânjiloru, trâ prota oarâ dupu tsi istoria lj-ampârtsâ aua sh-vârâ sutâ di anji, trâ itia câ aestu locu easti trâ noi, Armânjilji / Makedonarmânjilji, unu locu simbolicu trâ Minarea Culturalâ Armâneascâ di aua sh-cama di dauâ suti tsindzâts di anji, unu locu mplineu nu mashi di toarili a tricutlui ama sh-di seamnili a yinatorlui. S-andreapsi aestâ andamusi Muscopuli trâ itia câ tu aestu locu anyie trâ prota oarâ tu Balcanu unu spiritu ahoryea, putemu s-dzâtseu evropeanu, ashi cumu s-caftâ adzâ tu Evropa nauâ.

Minduindalui sâ-lj si da alushtuiu iventu unâ simasii cama ahândoasâ, pareili di tiniri tsi andrupârâ multu andridzerli trâ aestâ andamusi, organidzarâ trâ dizvârtearea a pruyramâljei sh-trei simpoziumuri tu dzâlili di Gioi, Viniri sh-Sâmbâtâ cu themi ligati di istoria a câsâbâlui Muscopuli sh-loclu a lui tu Balcanu, di spiritualitatea ortodoxâ tu Balcanu sh-loclu a ljei trâ acrishtearea a culturâljei muscupuleanâ. Simpoziumlu di Sâmbâtâ tsi avu ca themâ “Catastasea di tora a populiloru reghionali tu Evropâ sh-maxusu tu Balcanu, studiu trâ Armânji”, cumândâsiti di duruta armânâ Av. Chirana Darlaiani, s-hârsi di unâ mari partitsipantsâ, s-purtarâ multi cuvendzâ ligati di catastasea Armânjiloru di tora tu cathi cratu ditu Balcanu iu elji bâneadzâ.

Gioi dicsearâ fu andreaptâ la casa a pricljisitorlui Thoma Jidro di Curceaua unâ galerii di artâ cu lucrâri di sclupturâ sh-zugrâpseri di artishtsâ Armânji, trâ cari multu andrupâmintu lu deadi cunuscutlu pricljisitoru armânu Mihali Tugearu, tsi ari agiutatâ multu sh-trâ andridzerli ali padea di Muscopuli, aclo iu Dumânicâ s-adunarâ njilji di Armânji di iutsido.

Dzuua di Dumânicâ, di Stâ-Mârii, avigljitoarea Armânamiljei, dzuuâ pisimâ aleaptâ maxusu trâ Adunarea Atsea Mari a Armânjiloru, ahurhi cu Liturgia tu bêsearica „Stâ-Mâria” di Muscopuli iu preftulu Thoma Samara tsânu Dyiavasea tu mushata limbâ armâneascâ. Dupu agiumta a uaspitsloru tu padea di Muscopuli, andreaptâ maxusu trâ aestu iventu, la sihatea 12:00, prezidentulu a Consillui Armânjiloru dishcljisi Adunarea Atsea Mari a Armânjiloru, dupu cuvenda a lui, zburârâ vitseprezidentsâlji ditu consilu tsi suntu sh-prezidentsâ a Fariloru membri tu Consillu Armânjiloru: Mita Papuli (R. Makidunia), Steryiu Samara (Rumânii), Arben Lena (Arbinishii), Nico Chiurkci (Vâryârii), Lila Cona (Sârbii), Iancu Perifan (Frântsii), sh Niculaki Caracota – grâmâticlu ghegeneralu a Consillui Armânjiloru.

Tinjisi aestâ andamusi parlamentarlu evropeanu, armânu ditu Rumânii, Gigi Becali, cu zborlu tsi l-u avu. Ditu Arbinishii, Ministerlu trâ Culturâ tinjisi andamusea armâneascâ di Muscopuli cu zborlu alu Nikola Lena.

Cu multâ harauâ fu aprukeatâ mintimena cuvendâ a prezidentului di la Sutsata Armânjiloru di Veria, Yioryi Prapa.

Tu bitisita a cuvendzâloru, Yiani Mantsu, prezidentu a Consillui Armânjiloru, pârâstâsi „Dimândarea – Muscopuli 2010”, apufusitâ tu Biroulu di Cumândâseari a Consillui Armânjiloru / Makedonarmânjiloru, dimândari / rezolutsiuni tsi fu aprukeatâ cu multâ harauâ di Armânjilji tsi vinirâ la andamusea di Muscopuli.

Ditu pruyrama artisticâ tsi s-dizvârti kiro di patru sihâts, cu sutsati di giucâtori sh-cântâtori ditu R. Makidunia, Rumânii, Arbinishii, prindi s-adutsemu aminti haraua tsi u-avurâ tuts ascultândalui mushatili cântitsi armâneshtsâ ali naima avdzâta cântâtoari ditu Arbinishii, armâna Eli Fara.

Adunarea di Muscopuli, fu prota adunari armâneascâ a Armânjiloru di iutsido. Vremu s-pistipsimu câ aestâ ahurhitâ va s-agiungâ s-hibâ unâ aradhâ tu yinitoru, sh-tu alti locuri armâneshtsâ iu s-nâ spunemu a populiloru, anamisa di cari bânâmu, cu yishtearea a noastâ culturalâ tsi dzuuâ di dzuuâ vremu s-u acrishtemu.

Ti tuti andridzerli trâ aestâ Mari Andamusi di Muscopuli prindi, fârâ di altâ, s-hâristusimu prota a pareiloru di tiniri ditu craturli ditu Balcanu, cari kiro di unâ stâmânâ, cumândâsits di vrearea shi shtearea trâ ahtâri lucrî alu Costa Canacheu, managerlu andridzeriloru alishteî andamusi, lucrarâ dzuuâ sh-noapti ta s-adarâ ditu Muscopuli unâ hoarâ safi armâneascâ, andreaptâ ca tu unu pirmithu ditu cârtsâ, cu tutâ isturia a ljei, spusâ pritu caduri mări, arâdâpsiti ditu intratâ pânâ tu padea iu s-ari dizvârtitâ pruyrama andamusiljei.

Lucurlu tsi-lu featsirâ tinirlji Thanas Stamuli, Steryiu Stamuli, Nasi Calintsaru, Dana Costea, Laura Armeanu, George Zgura, Shtefan, Cati Custura, Cornelia Zaifu, Flori Tase, Dana Custura, Theo Nicolae, Nicole Tugearu, Mihali Caciandoni, Costin Damasharu, Giorgiana Tugearu, Nicu Vrana, Erica Tugearu, Costin Guci, Cristina Angiara, Nico Poci, Elton Ciaushi, Nico Kapurani, Zico Angiara, Custandin Tsatsa, Andoni Shcodrani, Custica Zguri, Vasili Zguri, Custica Poci, prindi s-lu alâvdâmu shi s-lu tinjisimu (ljirtari, ma s-hibâ di agârshimu vâra numâ).

La aestâ mari andamusi furâ câlisiti kiversisili a statiloru ditu Balcanu iu bâneadzâ Armânjilji, sh-multi alti institutsiuni evropeni, nvitsats evropenji avdzâts, di iu apukemu mushati zboarâ di hâristuseari sh-di lucru ambaru, zboarâ di pricunushteari ti lucurlu tsi-lu fatsi Consillu Armânjiloru/Makedonarmânjiloru.

Cu aestâ Andamusi a Armânjiloru di Iutsido, Armânjilji spusirâ câ suntu UNU POPULU, unâ mileti ahoryea, cu idyia limbâ, adets, culturâ, a s-hibâ câ isturia lj-ampârtsâ di vârnâ 100 di anji, fârâ sâ-lj ntreabâ.

Consillu Armânjiloru pitricu unu mesagiu di Vreari, Acâkiseari sh-di Dialogu câta tutâ Armânamea sh-câta tuti kiversisli a craturiloru iu bâneadzâ Armânjilji.

Vremu s-pistipsimu câ aestâ protâ Adunari Atsea Mari va dishteaptâ vrearea sh-dukearea trâ lucurlu armânescu, acâkisearea anamisa di-Armânji trâ sinferlu safi Armânescu!

Consillu Armânjiloru / Makedonarmânjiloru  
Biroulu di Cumândâseari

tu 20-li di Agustu 2010

\*  
\* \*

## ADUNAREA ATSEA MARI A ARMÂNJILORU 15-li di Agustu 2010, MUSCOPULI

### DIMÂNDARI

**Noi,**

**Armânjilji** ditu tuti craturli di iu bânămu, tsi himu vinitis la Adunarea Atsea Mari di Muscopuli, dizvârtitâ tu dzuua di Stâ-Mârii, 2010, tra s-yiurtusimu unâ aleaptâ dzuuâ pisimâ sh-tu idyiulu kiro turnarea a noastâ tu aestu locu simbolicu, thimiljiusitu di strâpâpânjilji-a noshtsâ,

**Ma s-luyursimu** câ anamisa di vecljili populi evropeni, autohtonji tu Balcanu, Armânjilji suntu paradihmâ di continuitati istoricâ sh-unâ urnechi di bânaticu deadunu cu alanti populi,

**Cândâsits câ** adzâ, mashi noi, Armânjilji, putemu sâ spunemu dinintea a lumiljei cari sh-tsi himu sh-câ purtâmu unâ ahoryea fortunâ ti ascâparea a tsivilizatsiljei a noastâ,

**Minduindalui câ** Armânjilji au trã prota oarã tu istoria a loru modernã, shansa tra sã s-aspunã a lumiljei cu identitatea a loru dealihea,

**Avândalui tu videalã** câ Armânjiloru lâ si pricadi tra sã s-hârseascã di tuti ndrepturli siyurãpsiti di nomurli evropeani shi internatsiunali tsi va li tritsemu pi-aradã: Conventsia Evropeanã ti Ndrepturli a Omlui (1950); Cundrata ONU tu ligãturã cu Ndrepturli Tsivili sh’Polititsi (1966); Cundrata-cadru trã Avigljarea a Minoritãsloru Natsiunali (1994); Carta Evropeanã a Limbilor Reghionali icã Minoritari (1992); Declaratsiunea Universalã ti Ndrepturli a Omlui (1948); Declaratsiunea ONU tu ligãturã cu Ndrepturli a inshiloru tsi tsãnu di minoritãtsli natsionali icã etnitsi, di pisti sh’lingvistitsi (1992),

**Ti tuti aesti itii**, Consillu Armânjiloru apufuseashti aestã

## DIMÂNDARI

- **Consillu Armânjiloru** caftã la tuti craturli ditu Balcanu, iu bãneadzã Armânjilji (Arbinishia, Gãrtsia, Rumânia, Ex Republica Iugoslavã Makidunia, Sãrbia, Vãryãria) ca factorilji detsizionali, constitutsionali shi autoritãtsli publitsi tsi au borgi tu dumenea ti ndrepturli a omlui s-cilãstiseascã tra s-asiyuripseascã tinjisearea, avigljarea shi acrishtearea a yishterilor shi a identitatiljei etnicã, culturalã, lingvisticã shi di pisti a Armânjiloru.
- **Consillu Armânjiloru** caftã pricãnushtearea a Armânjiloru ca populu reghionalu tsi easti autohtonu tu Balcanu.
- **Consillu Armânjiloru** caftã la tuti craturli ditu Balcanu, iu bãneadzã Armânjilji, s-ljia unã apofasi tu noima a nomurilor evropeani sh-internatsiunali cari siyurãpsescu ndrepturli tsi lâ si pricadu Armânjiloru ca populu reghionalu.
- **Consillu Armânjiloru** caftã unu dialogu dishcljisu, dimucraticu, cu tuti guvernili a craturiloru balcanitsi, iu bãneadzã Armânjilji, tra sã s-aflã cãljurli trã yinatorlu a limbãljei sh-a culturãljei armãneascã, va s-dzãcã bãgarea a limbãljei tu sculii, mass-media shi bãsearicã.

Dimândarea apufusitã adzã, 15-li di Agustu 2010, Muscopuli, cu furnjia Adunariljei Atsea Mari a Armânjiloru.

tu 15-li di Agustu 2010 / Muscopuli, Arbinishii

(Bulitinu Infurmativu Nr. 23)